

冲庵顧先生撫遼奏議

冲菴顧先生撫遼奏議卷之四

通州 益卿顧養謙著

疏

奉諭查勘清丈田地復 命

奏為欽奉

勅諭事萬曆十二年五月二十七日欽奉

勅巡撫遼東都御史清丈田地本為查豁虛糧以除  
民累先因各該地方官員奉行不善以致弊端  
百出反為民害近該言官奏請釐正該部覆議  
相應今特命爾不妨巡撫職務遵奉節次詔旨

督率司道及府州縣廉能官員查照該部題准  
事理通行所屬地方曉諭軍民如近年清丈過  
田地但有短縮步弓虛增地畝變亂冊籍混淆  
等則及將坡蕩墳屋作為平田衝壓積荒作為  
熟地高腴上田作為荒蕪一切奸弊貽累者許  
令首告在官爾即督令各官查勘明實要見一  
府之中何州縣最稱不便一州縣之中何都圖  
最稱不便爾即設法釐正從宜區處或舊額原  
自均平願復舊者准與復舊或近日清丈停妥  
願從新者聽其從新或利多弊少止應抽查一

二者即與摘查或槩州合縣告願重復丈量者  
即與復丈務要任從民便有益地方毋得踵襲  
近弊憚於更改亦不得通行覆丈反滋勞費如  
官吏書筭公正糧里人等作弊害人者爾即拏  
問叅究若有奸民勢豪顛倒是非鼓衆告擾及  
阻撓占恠圖便已私者從重究治通限萬曆十  
四年四月終報完亦不許遷延停閣事完之日  
分別承委各官賢否功罪以憑議處勅至之日  
如已經遵照摘查妥當地方相安者許即具由  
回奏爾須殫力竭慮慎密周詳務使國賦均平

民情安便方稱委任爾其欽承之故勅欽此案  
照先准戶部咨為恪遵

恩詔改正虛糧懇乞

聖明溥賜申飭以昭

嚴威以宣實惠以固萬年邦本事該屯田御史江東  
之戶科都給事中蕭彥等工科給事中張棟各  
題稱清丈弊多查摘當慎在江東之則欲添差  
御史專行查理在蕭彥等則欲寬限期順土宜  
專責撫臣在張棟則欲專用撫臣及郡縣正官  
寬假責成以善後事該本部覆題奉

聖旨清丈田地本為查豁虛糧永除民累前因撫按官督責嚴急有司多阿承邀譽苟且塞責以致增額升科等則混亂徒滋煩擾你部裏既議停當俱依擬著各該巡撫官督率司府州縣遵奉詔旨參酌查正有該照舊從新摘改覆丈的務從民便不許規避遷延紛更勞費各巡按御史著實稽查有故違的還著該科不時參奏處治欽此欽遵備咨前來煩照本部題奉

欽依內事理欽遵施行計開款內本部覆議看得添差御史委有專責易以完事但添官不無煩擾

各該巡撫見在地方且田糧係其職掌專以責之最為省便布政司及各分守道均有地方之責政體相關難以獨遺合無將各省直巡撫外加

勅書一道令其專理摘查文到之日一面移文布政司及各分守道府州縣掌印正官一一查議停妥出給簡明告示許令百姓首告州縣官不許威挾阻抑如一省之中要見該查者幾府一府之中要見該查者幾州幾縣一州一縣之中要見該查者幾都幾圖隨其土俗察其利害可一

則即從一則不必分其等可分等即分等不必  
定於一民情已見詳加斟酌免摘查者開數咨  
報俱照新丈冊籍徵派諭令相安其應摘查者  
方行選委通達民情練習政務掌印官親詣各  
該地方公同查改掌印官不能兼理者另委附  
近賢能正官以此官始事即以此官終事期在  
浮糧俱有著落等則不相混淆事完之日分別  
功罪其承委實心任事稽查得法衆口稱便効  
勞日久暫稽陞遷者即從異處其資俸少淺而  
從事有勞亦當先期優敘以酬其功如各該有



司隱護不肯據實申報及威挾小民不許告訴  
或承委官員不行親詣用心查理苟且完事虛  
文塞責反滋弊端無益實政者聽巡撫指實奏  
奏以憑議覆陞遷降黜至巡按御史一方風紀  
有糾察奸弊之責雖不可侵越以亂職掌亦難  
以緘默坐視民瘼合無亦加

勅書一道令其專司糾察事完巡撫將查改過田糧  
數目造冊巡按將糾察過奸弊緣由同原領

勅書一併奏報青冊送部查考巡撫不實心督理巡  
按不盡法糾察縱令各官仍前怠玩聽該科登

本部從實叅究庶官有責成民無貽患等因該  
前巡撫兵部右侍郎李 備行各該道寺欽遵  
查照一一著實舉行仍一面出示曉諭各該軍  
民人等知悉但係有糧無地貽累包賠者許赴  
各該道寺告理即與分豁改正以後再有告訴  
不便者定將各該衛所并清丈官員從重叅寃  
去後續據山東布政使司分守遼海東寧道兼  
理邊備右叅議傅霖呈蒙臣并巡按御史案驗  
依蒙行據原任遼陽通判張天衢呈會同原任  
自在州知州侯一位行准定遼左等瀋陽六衛

并蒲河撫順二所印屯官員手本回稱查得各  
衛左等所掌印管屯千百戶王之都等俱各結  
稱各所屯科田糧俱自萬曆九年奉明文清丈  
明白俱照等則徵糧並無短縮步子虛增地畝  
亦無墳屋積荒有糧無地貽累包賠之害無憑  
查丈又准定遼右衛手本回稱查得本衛所屬  
寬奠大奠永奠長奠四堡於萬曆二年創建夷  
地新展邊疆官軍分剩荒佃山場續有住民柯  
繼時等告明開墾量准納科並無屯田裁派賠  
納情弊緣由各回復到職備由呈報到道看得

定遼左等瀋陽七衛蒲河撫順二所屯科田地  
於萬曆九年奉明清丈俱照等則受糧給發由  
票至秋徵納已經造冊報部每年徵完糧石具  
本

奏報經今五年中間並無虛增地畝混淆等則及  
將坡墳作為平田積荒作為熟地膏腴作為荒  
蕪舊額已均民心稱便合無將屯科田地照舊  
徵納免其丈量等因又據分巡遼海東寧道兼  
理廣寧等處兵備按察使任天祚呈除備出告  
示外及據先管廣寧備禦事遊擊章應選呈行

據廣寧四衛掌印管屯指揮安熬張應秋等義  
州備禦栢朝翠呈行據義後二衛掌印管屯指  
揮郭濟川等原任錦州守備張粹呈行據廣寧  
左中二屯衛掌印管屯指揮張問政等原任廣  
寧右屯備禦丁倣呈行據右屯衛掌印管屯指  
揮黑雲鳳等各呈稱查得各衛所屬軍民人等  
承種屯科營田糧石俱已於萬曆九年二月內  
奉

欽依明文行委各官親詣各衛該管地方公同各該  
屯堡知識人等逐一沿坵履畝從公清丈明白

造冊

奏繳訖中間並無有糧無地亦無貽累包賠虛糧  
無憑查議又經出示曉諭經今五年並無一人  
告辯各緣由回報到道據此看得廣寧錦義右  
屯守備備禦章應選張粹柏朝翠丁倣各查稱  
廣寧等九衛軍民人等各承種屯科營田糧石  
俱已奉明委官親詣各該屯堡沿坵履畝清丈  
明白已經造冊

奏繳今蒙覆丈並無有糧無地亦無貽累包賠虛  
糧各呈報前來無容別議等因又據整飭寧前

兵備右叅政劉易從呈據寧遠衛經歷司署事  
訓導周于德廣寧前屯衛經歷杜本仁各呈稱  
會同掌印指揮董耀威王宗堯查得遼東田賦  
國初時通屬稱均自大虜大荒之後其人漸少其  
地漸荒而浮糧之弊滋矣至於寧前一路猶為  
全遼咽喉近邊逼海南北相去僅二十里東西  
相距僅二百餘里嘉靖庚戌以來虜患頻仍民  
間納糧田地近邊者棄逼海者荒其成熟田地  
或被豪強之兼併或苦名色之多端曰屯糧曰  
營田曰太監糧曰地科米已有重征之苦又或

地去糧存復議以人納糧上戶每丁一分下戶  
二丁一分誠為負累當事者每欲均其輸而釐  
其弊但事屬更變徒切隱憂至萬曆九年奉

旨清丈浮糧已蒙前道大軫民瘼掄選能幹官員親  
詣地內將寧前二衛中左等四所連山等五驛  
田地編設井田之法竈立封堆其井內成熟民  
田并新荒願復開種者俱照依上中下等第逐  
一沿坵履畝踏丈明白填給由票照數輸納穀  
豆在倉作為軍餉其前地科等項名色已經除  
改至於山岡沙渚舊路古墳河泊港溝海瀕荒



佃盡行豁免又經出示曉諭城所驛堡官軍人等知悉如或有糧無地許令首告准與分豁改正經今五年並無一人告豁虛糧無憑造冊緣由回報到道據此看得寧前田地已經奉

旨清丈納糧版冊已定今經五年委無有糧無地貽累包賠之弊即通行遍示曉諭亦無告辯虛地浮糧既經兩衛經歷司查報前來無容別議似應遵照原文成規納糧永為遵守等因又據整飭開原兵備右叅政王緘呈據安樂州知州張一舉申稱會同三萬遼海鐵嶺三衛掌印管屯

并上年委官經歷吏目等官孫策等各欽遵清查覆丈去後今准各衛手本回稱出示曉諭軍民人等俱稱上年清丈田畝均平並無貽累包賠虛糧無憑重複丈量相應照舊聽從民便各緣由回覆到州猶恐不的又經移文各衛覆查亦稱開原鐵嶺等城堡乃極邊孤懸盡頭之處地廣人稀拋荒甚多其軍民所種田土上年委官清丈明白委無有糧無地包賠情弊各衛公堂見今豎立清丈田糧大總額數石碑可據每歲照此徵糧貯倉不敢增減升合年終

奏報無容再議造冊回復前來覆查相同委係軍民各願從新丈上納不願覆丈是的緣由申報到道看得各衛田糧既經州衛覆查並無有糧無地包賠情弊相應照舊聽從民便免其覆丈每歲徵糧貯倉等因又據整飭金復海蓋兵備管苑馬寺卿事右叅政郝杰呈據主簿楊儒呈依蒙行准金復蓋三衛回稱本衛田糧自清丈後並無軍餘告豁虛糧無憑開復又准海州衛掌印指揮花應龍回稱卷查萬曆七年蒙撫按兩院案驗出示曉諭軍民人等凡故絕軍田儘

力開種比本衛軍餘姜興周等各陸續告種絕  
軍劉均祥等荒田各給有印票執照萬曆九年  
四月內前任主簿李臯奉明文到衛清丈田畝  
同管屯指揮徐維藩將姜興周等告種前地俱  
造冊報部訖萬曆十年十月內奉明文追納姜  
興周等佃種劉均祥等官田照冊追徵屯糧完  
倉萬曆十二年奉例行查有糧無地分豁改正  
姜興周等思因佃種劉均祥等屯田告要起科  
改正狀赴前道批仰本衛前掌印指揮王善政  
查報關行管屯指揮徐維藩轉行各百戶所查

得姜興周等相應納科具結回關本衛轉呈前  
道仍行本廳覆查仍將納科緣由呈報前道曹  
按察使於年終冊內開報本院續蒙案驗備行  
本道即查海州衛萬曆九年清丈田糧有地則  
定糧以後逋年俱已徵完今稱虛糧要見原清  
田地何人隱占逋年何人佃賠始初呈豁災糧  
之時緣何不行一併告豁延今數年方稱虛數  
是何緣故備細查明詳報仍行本職細查得凡  
佃種屯田即納屯糧姜興周等乘改正虛糧之  
詔輒紛紛告擾夫種屯田而不肯納屯糧一衛軍餉

出於何地徐維藩許令開豁不知何故緣由回  
報本道又行本官親詣海州衛審勘應否民便  
續據主簿楊儒呈稱親詣海州衛會同掌印指  
揮花應龍代管屯指揮祝世泰經歷魯宗範隨  
拘詹樂姜興周等逐名查審各稱先年奉明文  
告種絕軍荒田應納屯糧造冊回報因奉新例  
各佃戶欲脫屯糧圖輕納科成法豈敢變亂等  
因又據代管屯指揮祝世泰開稱姜興周等前  
項告豁未完屯糧二千二百六十一石一斗七  
升五合已追完九百五石一斗四升五合未完

者見今追徵陸續完報續又據祝世泰報稱又  
追完八百六十三石一斗八升五合緣由各到  
道據此除金復蓋三衛並無虛糧取有甘結及  
海州衛各屯戶已經丈清並無告豁者俱無容  
別議外看得屯田原有定畝屯糧原有定額自  
祖宗二百餘年以來未之有改也姜興周等告種劉  
均祥等田在各所實係屯地原非科田已前俱  
照數上納穀豆訖至萬曆十二年姜興周等因  
奉例豁虛遂謀告納科希圖輕便管屯指揮徐  
維藩不查

國賦因而妄呈計豁糧二千二百六十一石一斗  
七升五合今冊查得唐欒等八十五名係種絕  
軍劉禿兒等屯田九十五分姜興周等六十三  
名係種絕軍劉均祥等屯田七十五分蕭得衣  
等四十七名係種絕軍張厦兒等屯田七十二  
分承種既係屯田租糧擅難改額似應仍照原  
丈冊徵收庶於屯田原額不失並將管指揮徐  
維藩據實叅報等因各到臣看得查豁虛糧原  
恐先事丈量之官虛增畝數貽累包賠故欲復  
行清查以除民害該先任巡撫侍郎李與臣



舊唐書  
卷之四  
一  
遵奉

詔旨

勅諭節次嚴行各道寺督率衛所掌印官員著實查勘并出示曉諭軍民知悉或有糧無地貽累包賠者即當覆丈固不敢規避重遺民害如田糧均平地方相安者即當仍舊亦不敢紛更以滋民擾况本鎮疲憊已極尤當體恤荷蒙

皇上加惠元元屢頒

詔旨臣等敢不仰體

德意以蘇民艱今據各道寺并各委官各衛所掌印

等官查稱定遼左等二十四衛所驛堡田糧上年俱已清丈明白並無虛增地畝增額升科及坡蕩墳屋作為平田衝壓積荒作為熟地膏腴上田作為荒蕪等弊事既傳妥民亦稱便無容摘查覆丈委宜照依新丈冊籍徵納惟海州衛軍餘姜興周等領種原係屯田自當照納屯田穀豆乃乘清查

詔旨朦朧告改科糧計其實數計糧二千二百六十餘石是欲改多為少原非虛糧先該新舊兩道交代耽延遂致稽遲月日今據叅政郝杰冊查

啓樂等八十五名係種屯田九十五分姜興周等六十三名係種屯田七十五分蕭得衣等四十七名係種屯田七十二分見今前後已徵完一千七百六十八石有零等因為照姜興周等承種田地既查係屯田即係額餉所告虛豁遽難擬減應從該道所議仍照原冊徵納庶於屯畝得免荒蕪而邊餉不致虧損為此今將前項查勘過緣由併原奉

勅書一道合行

奏繳叅照海州衛納級指揮僉事徐

某亦竊世

祿專理催科不思

國賦之常經任情更變歛市屯民之小惠妄意申  
呈奉法反以容奸假公因而滋弊所當罰治以  
示懲戒伏乞

勅下戶部再加查議題覆施行為此具本  
進繳謹具奏

聞

官軍拒敵出境併諭市夷送還被虜人畜

題為達賊節次入犯官軍奮勇拒敵出境併善諭  
市夷送還被虜人畜事案照萬曆十四年三等  
月二十六等日節准軍門咨據臺頭等路稟報  
各營達子亂哭因遼東人馬殺了他三營達子  
無數有土蛮同把免兒等大小頭腦傳調達子  
十萬餘騎要在寧遠廣寧遼瀋等處報讐俱已  
通行各道將哨備收斂本年五月內據開原兵  
備右叅政王緘稟據回鄉李乃奇供說騷達子  
打刺漢調各處大小頭兒要搶廣寧留下龍免

伯言犯搶開原鐵嶺四月二十七日達賊約有三千餘騎從開原威遠堡進入分為二枝一枝約一千餘騎奔鎮壯堡一枝約二千餘騎奔靖安堡各攻圍有各守堡并設防官兵迎敵射打各賊退遯虜掠隣境屬夷猛骨孛羅下部落劄失卜等在關牧放牛五十隻劄失卜等同設防官軍截下賊見開原衆備等官宿振武等兵馬追趕至近精兵達賊千餘迎敵因我兵勇猛即從來路出境去訖奪獲達馬四匹被賊射死軍士石上元等四名射傷商甫等六名射死官馬

二匹虜去軍夜磨景等五名經行樵採男婦祁  
大林等二十八名口馬牛一十五匹隻該本道  
照得此虜的係福餘衛西市屬夷隨行宿振武  
會同本道責差備禦中軍十總等官吳希漢等  
前去慶雲堡會同備禦吳嗣勲守堡王鳳翹督  
令通事王勲等執牌宣諭買賣夷人恍忽太營  
達子草困你等既為忠順夷人緣何陽順陰逆  
這邊買賣那邊即犯搶且爾等衣食費用皆仰  
賴我

中國若將搶去人畜送還這條路還容你討賞若

不聽我宣諭送回原虜人畜閉關絕賞題

請把你各營頭兒大賞盡都革了還請兵馬剿殺等語草困慌懼回營與恍忽太說知本夷即帶領部下達子迎見原搶賊酋义哈兒等將前虜去臺軍夜役并經行樵採詹景等三十三名口馬三匹牛一十二隻盡數截下令草困等於四月三十日先將男婦詹景等二十九名口牛十二隻送進慶雲堡備禦吳嗣勲又宣諭草困等供出還有人四名馬三匹在營留下有义哈兒等說稱我們拏的裏邊人畜都看你營截下送與



他去他裏邊人馬奪去我們達子馬四匹叫他  
與我們將他這四箇人三匹馬都與他等情備  
由連人呈解到道隨即逐名面審唐景等親口  
供稱前虜人口實止此數除將送回人口查發  
寧家牛給各主認領仍行令中軍王汝徵等將  
得獲達馬四匹准給夷人將留下人四名馬三  
匹宣諭作速送還外又據寧前兵備右叅政劉  
易從呈五月二十四日達賊八百餘騎從前屯  
瑞昌堡進入前屯遊擊祖承訓聞報統領官軍  
追至刺黎山遇賊對敵斬獲首級一顆達馬一

十五匹并夷器等件被賊砍射死軍丁王仲儒等三十六名被傷官丁元思恭等四十五員名射死官馬騾五十五匹頭射傷三十八匹頭前賊因官軍血戰退回去訖等因各到臣除被殺被傷官丁給與優恤湯藥得獲達馬夷器俱給原獲之人充賞斬獲首級聽巡按衙門紀驗外臣會同總督薊遼保定等處軍務兼理糧餉都察院右都御史兼兵部右侍郎王鎮守總兵官太保兼太子太保寧遠伯李議照遼

左自二月大捷之後諸虜糾結報雙峰屯蟻聚

沿邊無處不窺一犯開原撲掠人畜賴鄉者殺  
伐之餘威而該道協同將領等官善諭市夷即  
復送還此從來所未有一犯前屯而官兵奮勇  
拒戰出境兵馬雖有損傷皆係臨陣對敵以致  
捐軀而達賊死傷之數亦畧相當第其勢不能  
一一得其首虜耳而官兵之忠勇則深有可念  
者除仍行各道嚴督將領等官比常加謹隄備  
不許時刻懈防勿致乘隙圖犯以保萬全并諭  
夷効勞官役宿振武等及夷人恍忽太等已該  
臣動支庫貯銀兩襖段等物酌量賞犒外所據

地方失事及獲功陣亡官軍相應具

題伏乞

勅下兵部再加查議轉行巡按御史將應叅應問應恤人員并地方有無隱匿等情通行覈勘明實徑自具

奏施行為此具本謹題請

旨

遼東缺掌印都司

題為缺官事准兵部咨武選清吏司案呈奉本部  
送准薊遼總督侍郎王

巡撫遼東右僉都

御史顧

各咨稱遼東都司掌印蕭

某叅

論革任所有員缺要將原任海州叅將郭夢徵  
原任都司僉書王盛宗改補等因咨部送司案  
呈到部查得近該吏科右給事中王三宅題議  
武官陞轉無據等事本部覆奉

聖旨是今後武官考察論革非係地方緊急督撫特  
薦的不許推用欽此今查原任叅將郭夢徵曾

經論劾革任雖有咨文薦語可據但未經督撫  
疏薦似難遽題備咨前來煩查原任叅將等官  
郭夢徵等如果堪補前缺會同薊遼總督具

奏薦補以憑覆

請施行等因到臣又准總督軍門咨同前事准此案  
照先該臣照得遼東掌印都司蕭某該臣會  
同巡按山東監察御史王國弼叅論不職革任  
所據員缺查得原任海州叅將郭夢徵魁偉不  
群慷慨有志武弁共推材畧閫司當見作為原  
任都司僉書管鎮武堡遊擊事王盛宗論議通

豈夷險周知威惠能馭三軍謀勇可當一面俱堪陞補已經咨行兵部酌議題

請去後今准前因臣會同總督薊遼保定等處軍務兼理糧餉都察院右都御史兼兵部右侍郎王議照原任海州叅將郭夢徵自萬曆三年該巡按御史劉臺叅論革職提問功罪罰未完結自萬曆十年起節該薊遼總督侍郎周

薦揚英偉之貌精壯之年養晦惟知杜門督防不辭冒除又該巡撫都御史李於丁字泊捷功本內類薦陷陣摧鋒大奮貔虎之勇當前殿

後咸收捷伐之勲又該臣於鎮邊堡邊外可  
毋林捷功本內類薦一次又該臣推陪領兵遊  
擊薦舉一次以上薦舉四次原任都事僉書管  
鎮武堡遊擊事王盛宗自萬曆六年患病准令  
回衛調理候病痊之日酌量薦用後自萬曆十  
年起節該巡撫都御史周 薦揚偉貌長才誠  
心壯志經戰陣首功屢樹任專城勞績猶存又  
該巡按御史馬允登薦揚昂藏軀幹磊落肖襟  
啟齒多褻華之談彎弧擅穿揚之巧又該巡撫  
侍郎李 薦揚年力精壯體貌魁梧且戰陣屢



經而射技之長無比謀勇兼優而干城之寄足  
資以上薦舉三次今復行查前缺此二臣者相  
應陞補如蒙

勅下兵部再加查議將都司員缺於郭夢徵等酌量  
推補施行為此具本謹題請

旨

率官軍謝 欽賞

奏為感激

特恩恭率官軍陳

謝事先准兵部咨為大虜結聚謀犯主將相機出  
師仰仗

天威官兵奮勇擒斬獲收奇捷事該本部覆議本鎮  
鎮邊堡境外地名可可母林斬獲捷功等因節  
奉

聖旨該鎮出塞勦虜斬獲數多奇功可嘉李成梁先  
廕本衛兒男著陞三級還賞銀一百兩大紅紵

絲蟒衣一襲綵段四表裏王

陞都察院右

都御史兼兵部右侍郎照舊總督賞銀四十兩

紵絲四表裏顧

陞都察院右副都御史照

舊巡撫賞銀三十兩紵絲三表裏任天祚等俱

各賞銀二十兩任天祚仍陞一級趙三聘陞俸

一級李平胡查例加賞揚燮陞署都督僉事仍

復原降祖職李寧李興查大受孫守廉各加副

總兵職銜姚大節劉崇正各復舊銜俱照舊管

事塗寬等各陞一級王緘等各陞俸一級賞銀

十五兩傅霖准以原官調用葉夢熊等各賞銀

十兩高良弼等各八兩宿振武各五兩在陣血  
戰軍士著發馬價銀五千兩賞犒其餘俱依擬  
本兵調度有功張佳胤賞銀四十兩紵絲二表  
裏石星蕭廩各二十兩一表裏該司郎中銀十  
兩其餘各五兩加銜武官有相臨體統不便的  
還著督撫官查明更調欽此欽遵備咨到臣隨  
該本部委官進士柴堯年齎解賞銀五千兩至  
山海關該臣查照近

題事例差委廣寧右衛掌印指揮楊威領運到鎮  
臣欽遵會同鎮守總兵官太保兼太子太保寧

遠伯李成梁公同分巡遼海東寧道兼理廣寧等處兵備右布政使任天祚將前項各營出塞禦虜應賞官軍酌其勤勞多寡分別等第擇於萬曆十四年七月二十六日陳設

龍亭儀仗香案於演武廳聚集文武官軍官以班分軍以隊分將各應給銀兩預先劈鑿人各一封封各印記又恐劈封委官抵換短少復懸衡於庭公同抽封秤驗銀皆足色足數計銀五千兩共賞過禦虜官軍一萬八千三百八十四員名逐一唱名散完臣等恭率望

闕拜叩又仰奉

德意宣諭官軍爾等生長邊方與虜為鄰

朝廷平日作養爾輩原為禦虜安邊保爾身家爾  
今殺賊立功不過本分常事況有功人員已經  
照例陞賞荷蒙

皇上

天恩浩蕩

特念爾等血戰之苦

欽發帑銀

頒賞犒爾等受此非常

特恩今後愈要齊心竭力奮勇用命守期必固戰期  
必克以仰荅

皇恩於時文武將吏軍丁人等萬口同聲感激  
天恩歡呼踴躍倍增戰氣臣等待罪疆場忤逢  
曠典竊念本鎮地方處處當虜之衝諸營軍士四時  
征防終歲無室家之樂而日有鋒鏑死亡之憂  
危苦之狀未可盡述仰荷我

皇上注意衝邊

明見萬里

軫念血戰之勞

特頒額外之賞無論領受

欽賞者歡聲動地即全鎮將士亦莫不感勵奮發思  
一當強胡而效其死力古稱投醪挾纊何足為  
喻臣誠不勝慶幸不勝感激除給賞銀兩并官  
軍姓名造冊咨部查考外緣係感激

特恩恭率官軍陳

謝事理為此今將賞過銀兩等第并官軍名數理  
合開坐具本奏

聞

計開原發銀五千兩犒賞各營禦虜官軍家



丁一萬八千三百八十四員名

賞銀四錢正兵等營前鋒官軍家丁吳大才等八千六十員名共銀三千二百二十四兩

賞銀三錢火器等哨官軍樊敬等一千四百八十一員名共銀四百四十四兩三錢

賞銀二錢正兵營在哨并各營官軍馬文必等四千四百七十四員名共銀八百九十四兩八錢

賞銀一錢各營在哨官軍并塘砲馬軍士  
戴國勲等四千三百六十九員名共銀  
四百三十六兩九錢

州官患病乞容致仕

題為州官患病有難赴任乞容致仕事據整飭開  
原兵備山東布政使司右叅政王緘呈據署安  
樂州事遼海衛經歷杜進孝申稱萬曆十四年  
十二月初九日據本州原差接新任知州薛同  
術書辦門役胡大仁等齎到知州薛同術呈內  
稱本職係陝西西安府韓城縣人由舉人萬曆  
八年四月內陞授山東兗州府鉅野縣知縣歷  
俸方及三年因丁母憂於萬曆十三年十一月  
起復除補河南開封府儀封縣知縣本年十二

月十三日到任萬曆十四年六月二十日接報  
陞授今職七月終降憑八月十五日將各色倉  
庫錢糧眼同委官陳州同知單熙載交代明白  
即行赴任間不幸嫡妻雷氏陡因時疾亡故本  
職痛感委自送柩還籍中途致動痰火病症時  
發時止調理至今尚未痊可如欲加力奔馳誠  
恐軀命有礙况原籍抵開原程途六千餘里知  
州又係邊疆重任本職病體委不能赴且不能  
堪呈乞轉申各該上司俯容休致庶得身軀保  
全等情到州轉申到道為照開原衝邊道屬只

有一知州分理事務今自本年六月內知州張一舉陞任之後缺人廢事至今而新任知州薛同術因其妻故送柩還鄉中途患病又兼地方寒苦不願赴任見今移文十分停閣况賑濟饑民缺官委用呈乞速賜題

請就近推補賢能官員星馳到任以濟事艱等因到臣臣會同巡按山東監察御史王國弼議照遼東一鎮原設文職不多一切差委勘事查盤審編等項動輒乏人故本鎮安樂自在二州官員雖係拊轄土達遷民衙門無腹裏詞訟錢糧之

繁然每委之分理邊務需用甚急即使日不缺  
人尚苦委用不敷况屬賑濟災民急欲得人料  
理今新陞知州薛同術呈稱患病不能赴任既  
經該道呈報前來相應題

請如蒙

勅下吏部再加查議將新陞安樂州知州薛同術俯  
從致仕所遺員缺即選附近強壯才幹官員推  
補令其作速前來到任庶邊方分理得人而賑  
濟有賴矣為此具本謹題請

旨

憲臣患病不能供職

題為兵備憲臣患病不能供職事據分巡遼海東  
寧道兼理廣寧等處兵備山東按察司副使鮑  
希顏呈蒙臣批呈依蒙行據代廣寧通判事都  
事劉一貫呈行准寧遠衛掌印指揮楊景嵩手  
本回稱行據本衛醫學署印醫生李世弼申稱  
去年十一月內蒙寧前兵備劉叅政喚令本生  
胗驗委因痢疾過服涼藥致傷脾胃病證用藥  
調治至今未可取具印結回復到職備由轉報  
到道看得寧前兵備劉叅政端亮庶靜沉毅恢

宏當衝邊備極劬勩禦強夷尤多勲伐祇緣神  
思過勞是以感成痢疾先已具呈乞休蒙本院  
批留在任調理經今半載餘矣前疾愈加沉重  
以此懇切辭歸若遽令休致深為可惜呈乞俯  
賜蚤為題

請令其痊可起用或量移腹裏地方則四載勤勞庶  
不隳於一旦而往者既錄則將來者益有所勸  
矣等因到臣據此案照萬曆十四年十一月內  
先據整飭寧前兵備山東布政使司右叅政劉  
易從呈為危病難痊不能供職懇乞轉



題容令休致事職於本年八月感患痢病時因夏  
月霪雨坍塌城垣數多秋防傳報甚急地方可  
憂寢卧不安扶病幹理又過服寒涼之劑以致  
一痢纏綿四十餘日脾胃既傷中氣復損兩月  
來飲食不化日減一日用藥消導益加痞滿今  
形體已羸精神昏憤舉筆健忘遇事顛倒自度  
疾勢必無就痊之期任係衝邊又非卧治之地  
倘至誤事死不足贖伏乞題

請放歸等因該臣批寧前極衝極危之地遼左各道  
之難無過於此該道苦心三年矣地方正切倚

賴且掄才者當有優處以昭公道今安得以旦  
日小恙求去邊臣有此動舉恐人疑以為避難  
矣本院何可輕率具

題也該道量之仰即安心視事毋動他念反自焦  
勞也此繳萬曆十五年三月二十日又據叅政  
劉易從具呈前情案候間本年四月十六日又  
據本官呈稱前疾調理今經四月餘百方治療  
不惟無效反益加重胃腹痞滿脇肋脹痛痰火  
上攻頭目眩暈少涉思慮心輒如刺怔忡潮熱  
口舌乾裂即數夜不能寐因是案牘停閣諸務

皆廢不謂又於今月初十日忽然昏仆在地汗  
出如水家人扶掖半晌方醒頭痛愈甚痰吐不  
止自度疾勢日覺深沉若不再為具呈急求休  
致職一人骸骨奚足計誠恐瘵曠日久政務盡  
弛轉眼秋防誤事非細伏乞蚤為題

請容令休致等因已經批仰分巡道查勘去後今據  
前因臣會同總督薊遼保定等處軍務兼理糧  
餉都察院右都御史兼兵部右侍郎張 巡

按山東監察御史王國弼議照寧前為遼左咽  
喉之地地窄邊衝兵革虜近遼處其難而寧前

處遼之最難自人情視之若一日不可居其地者也參政劉易從在任且及四年業官有如一  
日覈軍實嚴脩守鼓舞將領拊循士卒實心實  
政任怨任勞使孤軍稱雄於塞上而狡虜素憚  
其威名且其誠心應物不忤不求報得失則主  
於不欺處功名則甘於恬退不紛華以趨時尚  
簡靜而敦古才既若彼而品又如此此臣素所  
心服而推讓者也夫以寧前之孤危方且倚之  
以為安而以臣材之駑下尤當引之以自助臣  
又安忍聽其言去也顧其病勢纏綿旦夕難愈

真有其所陳者蓋邊地積勞精神內損則其受病之原是以不得已而屢有乞休之請也今既該分巡道副使鮑希顏勘明委非假託相應代為題

請但本官勞未盡酬才堪大用若竟聽其去殊為可惜伏乞

勅下該部查議將叅政劉易從准令回籍調理病痊之日聽原籍撫按官具

奏起用則掄才者當必為

國家憐才而始終成就之矣為此具本謹題請

旨

寧遠缺備禦

題為缺官事據整飭寧前兵備山東布政使司右  
叅政劉易從呈萬曆十四年十二月二十二日  
據寧遠備禦中軍百戶劉印稟稱備禦楊四維  
於本月十七日得患腫頸病證至二十二日丑  
時身故情由到道除批義兵千總王宗堯速赴  
寧遠中左所暫代備禦事務外照得該所地要  
邊衝備禦不可久缺呈乞題

請相應官員速赴任管事等因到臣臣會同總督薊  
遼保定等處軍務兼理糧餉都察院右都御史

兼兵部右侍郎王 巡按山東監察御史王國  
弼議照寧遠備禦駐劄塔山中左所乃近邊極  
衝之地四時皆防之區今備禦楊四維病故所  
據員缺相應亟補查得寧遠衛都指揮僉事葛  
逢夏戰陣屢經矢志無忘橫草勇敢足任引弓  
可命穿楊寧遠衛指揮僉事王宗堯年茂而狀  
貌魁偉志銳而才略老成氣欲吞胡射能貫甲  
以上二員俱堪陞補寧遠備禦伏乞

勅下兵部再加查議將前項員缺即以葛逢夏等酌  
量推補庶衝邊得人而保障有賴矣為此具本



謹題請

旨